

[Augsburg], 18. April 1564

An Johannes Oporinus

UB Basel, Fr. Gr. I 11, fol. 271r-v.
Steinmann Nr. 761.

S. P. D. Ex Fuggerana Bibliotheca tuo mihi nomine data sunt Poemata sacra, Septima centuria, Corpus veteris testamenti, Glareani Epicedion, Tobias, Lucullianae quaestiones, Zanchinea, de quibus magnam habeo gratiam.

Obitum tot doctorum virorum aequè tecum doleo, sed epitaphia scribere non vacat nisi mihi ipsi: Caepi enim describere vitam meam, vt annis abhinc 16 petijsti. Quam vtrum Suidae adiungere velis (Etsi id D. Villingerum aegrè laturum puto) an ad secundam Officiorum editionem reseruare, tui iudicij est. Confectos habeo commentariolos in Catonem et Somnium. Si vixero diutius, praelegam Laelium etiam et Paradoxa, vt 2 editio tua sit locupletior. Bibliopolae flagitant graecolatinum Isocratem, cuius nullum vaenale exemplum in tota vrbe hac reperitur, efflagitatum a multis qui me nôrunt. Libros qui genium habent recudi potius quam excudi nouos abs te, sunt qui tua interesse censeant. Sed quid Sus Mineruam? Ego verò si de Isocrate recudendo cogitas, aliquid habeo consilij, quo, si probabis, vtare licebit. Accurâtè correxi Vitas Isocratis et 3 orationes paraeneticas, et confessos habeo iustos commentariolos, qui mediocrem Isocratis graecolatini tomum forma octaua conficient. Quem dum excudes, alterum etiam τόμον συμβουλευτικῶν confecero et sic deinceps, vt quatuor mediocribus tomis et biennio (si prius non licuerit) totus Isocrates prodeat

Iam positis nouis exuuijs nitidusque inuenta.

Haec cum petieris, ad te mittam. Sin minus: οἴκοι βέλτερον εἶναι.

De nouis operis aut operibus meis iampridem scripsi nihil tibi à me, volente quidem, expectandum. Quae autem in schola mea dictare soleo: ea et eiusmodi sunt, vt nec à me premi possint, et tantum relectionis laborem postulant, quem suscipere malo, quam Manibus meis iniuriam fieri mendosissima descriptione, cum praesertim periculum sit, ne alij suos pannos meis lucubrationibus assuant, cum veste mea minimè consentientes. In his igitur tuus sum et ero, dum ero, sicut fui dum scriptor fui, quem tu me fecisti, vt iure meritoque Wolfius Oporini ὑπογραμματεὺς dici possit, et Oporinus Wolfij dictator, isque perpetuus, sed meliore fato quam Iulius Caesar.

Hillerus sanctè affirmat, se Basilium graecum reddidisse Heruagio, sed ab eo ne γρὺ quidem attulit. Suspecta mihi res est. Ego subinde a Praetore nostro appellor. ἐνεγγύησα. πάρα δὲ ἡ ὄτη. Non credis quanti Senatus noster istiusmodi χειρόγραφα aestimet. Si codex perijt, magno meo et periculo et incommodo perijt. Sin Heruagio redditus est, is malam mihi pro nauata opera gratiam refert, qui ne accepisse quidem se, rescribere sit dignatus. A quo vt syngrapham accipiam, quaeso te curato. Alioqui enim a te in fraudem illectum esse me querar.

De Suida annotando vt tecum agerem, petijt a me D. Villingerus, qui etsi voti compos factus, me parum curare videtur (εἰωθὸς δὲ τοῦτο τοῖς δεινοῖς τῶν ἀνθρώπων) tamen et ipsius et mea causa rogo ac potius etiam tua, vt strenuè pergas, nisi forte ὑπουλόν τι sit, quod à me ignorari debeat, quod equidem susque deque fero, nisi quod per molesta mihi sunt ista πονηρεύματα μᾶλλον ἡ πανουργήματα. Sed si absque fuco res geritur, chartas excusas emendandi ergò mitti mihi velim. Carmina propter morosos homines, qui plurimi sunt, ad finem operis rejci velim. Idem et in Officijs mandaram, sed tu consuetudinem tuam quam sententiam meam sequi maluisti. ἀρχομένου ἔργου τηλαυγὲς εἶναι δεῖ τὸ πρόσωπον. Multi vix praefationes ferunt, tantum abest, vt tot paginas nugarum non execrentur, quae in fine operis facilius vel

delitescunt vel etiam leguntur. Sed ego ineptior, qui ὑπογραμματεὺς ὁν δικτάτωρι καὶ αὐτοκράτορι νομοθετῶ. Valebis igitur et rem bene geres. D. Peletario, si apud vos est, meo nomine salutem dices. Me hic illi commodare non potuisse doleo. Iterum vale. Raptim. 18. Aprilis 1564.

Hiero[nymus] Wolfius
Tuus.

Fabricianas literas tibi remitto, quia 21 Martij demum mihi allatae fuerunt, nec est hic [?] eas
mittendi occasio nisi fortuita, quales ἐμὲ οἰκουροῦντα fallunt.